



partii naleraq

8. April 2016

UPA2016/115

Inunngortunik, toqusunik, ilisinernik iliveqarfinnillu nalunaaruteqartarneq pillugu Inatsisartut inatsisissaattut nr. xx, xx 2016-imeersoq

Inunngortunik, kiisalu toqusunik, ilisinernik iliveqarfinnillu alunaaruteqartarneq pillugu inatsisartut inatsisissaattut siunnersuut Partii Naleqqamiit oqaaseqarfigissavarput.

Inatsisissatut siunnersuut saqqummiunneqartoq massakkumut atuuttumut sanilliullugu nutaartaqarpoq arlalinnik, tassalu inunngortoqarpat assersuutigalugu umiarsuarni, timmisartumiluunniit, taava taakkunani naalakkat pisussaaffilerneqarput umiarsualivimmut mittarfimmulluunniit tikinnermi kinguninnguagut nalunaaruteqartartussanngorlugit pisussaasunut, tassalu ilagiinnut palasimut atuagarsualerisumut, tamannalu soorunami pissusissamisoorpoq ersarissaasoqarmallu isumaqatigaarput.

Kiisalu aamma inatsimmut nutaamik ikkunneqartussanngortoq tassalu iliveqarfinik aqutsineq kiisalu ilanngullugu iliveqarfinnik aserfallaatsaalissarnissamik aammalu nakkutilliinermi aningaasalersuinikkut ilagiinnut piumasaqarneq inatsimmut ikkunneqartussa q ilumut aningaasartalerneqassannginnersoq paaserusupparput.

Tassami tamatta ilisimavarput ilagiit aningaasaqarnikkut atugassaqtitaanerit pitsaanerpaajunngitsoq oqaatigisariaqarmat, sinerissami nunaqarfinni illoqarfinnilu oqaluffiit aserfallassimasorujussuit pitsanngorsagassat ilagiit sinniisaaniit palasinillu oqariartuutigineqartuut aningaasassaqaqqanneq pissutigalugu kinguarsarneqartuupput taakkuinnaanngillat aamma palasit illui allallu atortut aserfallassimasorujussuit aningaasassaqaqqartinneqaratik aserfallakkiartuinnartut tusartuurtarput.

Tamakkulu eqqaassagaanni ilumut inatsimmut nutaamik ikkussinissaq asuli kusassaanerinnartut taagaanni immaqqa uniorpallaanngilaq, taamaattumik Naalakkersuisoq aperiniarparput iliveqarfinnik aserfallatsaaliinissaq ilagiit aningaasalersussagaat ilumut immikkut naalakkersuisunik aningaasaliiffiginierneqarnerisooq. Tassami taamaalisoqassanngippat nalunngilarput ilagiinnik aningaasanik amigaateqartuutunik akissaqaqqartinneqarnavianngitsoq.

Ilami ilageeqarnermi sullissineq appariartuinnartutut isikkulik assut akuersaaruminaatsutut isigaarput, ilaatigummi tassa naalagialluunniit pattattussaaruttalermata, tamannalu assut ilungersuummernartutut isigaarput.

Aammalu iliveqarfinnik torersuutitsinissaq eqqarsaatigalugu aamma piumasarineqartunut ilanngunneqarpoq iliveqarfiit assiliorneqassasut, taakkulu kikkunnik naammassineqassanersut ilanngullugu paaserusupparput aammalu kimit assiliornerit akilerneqassanersut ilanngullugit.

Nunatsinni iliveqarfiusinnaasut killeqaleriartorput nunarsuarput angigaluaqisoq illoqarfinni nunaqarfinnilu iliveqarfiusinnaasut assaaffigineqarsinnaasut killeqaleriartorput, tamannalu pissutigalugu siunissami toqusut timaanut ikuallaaveqalernissaa pinngitsorneqarsinnaajunnaariartuinnarpoq siunissamilu toqusut timaanut ikuallaavimmik pilersitsisinnaaneq piaartumik Naalakkersuisut aqutissiullugu misissussagaat kissaatigaarput.

Taavalu ilanngullugu iliveqarfiit inoqarfiunngitsuni qanga nunaqarfiusimasut eqqarsaatigalugit nalunaaqutsersuinissat qaqugu aallartinneqassanersut ilanngullugu paaserusupparput, tassami aamma inatsimmut ikkunneqartussanngormat soorlu qanga nunaqarfiusimasuni toqusoq ilisaanissaminik qinnuteqarsimappat immikkut akuerineqarluni ilisisoqarsinnaanngussammat tamannalu isumannaatsumik pissappat iliveqarfittoqat malittarisassanik peqarnissaat pingaarlunnarmat. Iliveqarfiimmi mianerisassaapput ataqqinneqartussaallutillu.

Taamatut oqaaseqarluta Partii Naleqqamiit siunnersuutigaaarput inatsiseqarnermut ataatsimiititaliami suliarineqassasoq.

Hans Enoksen
Partii Naleraq